

ARRÜNA SEGUNDO ÑACONOMOSORRTI SAN PABLO ÜMOTI TIMOTEO

1 ¹Arrüñü Pablo apóstol nü ümoti Jesucristo auqui noñemarrti Bae Tuparrü. Içipurutiñü nauqui suraboi arrüna urriampae manitacarrü. Ta arrti Tuparrü rranrrti acheti isüboriquibo bama icocoromati Jesucristo. ²Nirraquionco tanu aemo Timoteo, naqui tarucapae nacua iñemo; sobi tücañe aicococati Jesús.

Tari icunusüancanatiyü Tuparrü, naqui Uyaü, y arrti Señor Jesucristo. Tari urria naca uimia. Tari pucürusuma atacucü.

Pucünuñati Pablo aübu ñachampienacarrti

³Arrüñü urria niyaserebiqui ümoti Tuparrü, tacana bama antiburrü tücañe. Champü quiatarrü niñapensaca. Nantarrtai ñachampienacaca ümoti Tuparrü, arrtü rreanca atacucü. ⁴Tarucapae nirranca yasarü tatito, nauqui ane ipucünuncubu. Rraquioncañü nurria arrüna nasuchequi isiuñü aucutanu, nauquiche tiseca tato aesaquicü. ⁵Rraquioncañü ito iyo arrüna urriampae nacoconauncu ümoti Tuparrü. Cusürübo aicocoroti Jesús manu naporri, nürirri Loida. Auquito arrümanu napacüma nürirri Eunice icocoroti. Sane nauquiche arrücü ito aicococatito, bien tusio nurria iñemo.

⁶Sane nauquiche tapü tacürusu naquionco iyo arrüna nüriaca, arrüna torrio aemo uiti Tuparrü, numo iñata niñe atacü, y rreanca atacucü. Atrabaca te aübu narucurrü aemo aübu na nüriaca. ⁷Arrti Bae Tuparrü içipurutiti Espíriti Santo au nuyausasü. Uiti caüma chuirrucapü ñünana macirrtianuca. Bacheboti ucuñübu. Bayuraratito oemo, nauqui acuama oemo macirrtianuca, y nauqui urria numapensaca. ⁸Sane nauquiche tapü acüsoca anita içitüpüti Señor, naqui yasuriuruti oñü. Tapü acüsoca saübuñü itopiqui arrüna yaca au preso auqui nacarrti Jesús. Tapü ünantü aemo arrüna nataquisürücü itopiqui urapoi arrüna

urriampae manitacarrü. Asusiatai ataquisürübecü. Arrti Bae Tuparrü bacheboti acusiubucü. ⁹Arrti itaesümunuti oñü eanaqui nomünantü. Itasuruti oñü nauqui baserebi ümoti. Utaesübuca uiti champürrtü ui arrüna urria nuisamute y numapensaca, ta ui arrüna pucürusuti utacu auqui ñemonco. Iculusüancanati oñü itopiqui oñoncatü ümoti Jesús. ¹⁰Chauqui tütusio arrüna nipucürurrti utacu, itopiqui icüpurutiti Jesús icu na cürü, naqui uiche utaesübuca eanaqui nomünantü. Sane nauquiche champüqui nuirruca ñünana concorrü, itopiqui arrti Jesús urapoiti usucarü arrüna champü nitacüru nosüboriqui au napese.

¹¹Arrti Tuparrü icüpurutiñü tacana apóstol, nauqui suraboi arrüba omirriampae manitacarrü y nauqui rranuneca ümo macirrtianuca. ¹²Ichaquisürüca ui arrüna sane niyaserebiqui. Pero ta chisüsocapü. Itopiqui ñoncatü ümoti Tuparrü. Isuputacati nurria. Chauqui titorrimiacañü nurria ümoti. Tusio ito ñemo que arrti bacuirarati nurria ichacuñü cheperrtü iñatai manu nanenese ensümunu, anche ayeti tato Jesucristo auqui napese.

¹³Tapü tacürusu naquionco iyo arrüna ñemanauncurratöe manunecatarrü, arrüna iñununecacü. Aisamuse isiuqui. Tari onsotü nurria ümoti Jesucristo. Tari cuasürüti nurria aemo. ¹⁴Acuira nurria itacu manu manunecatarrü torrio aemo uiti Tuparrü. Acuira itacu ui yayuracarrti Espíritu Santo, naqui anati au nuyausasü.

¹⁵Chauqui tütusio aemo que arrübama masaruquitaquí auqui manu cürü Asia iñoconomañü. Arrüpecuma amoncoma arrti Figelo y arrti Hermógenes. ¹⁶Tari pucürusuti Tuparrü itacuti Onesíforo aübu nanaiña nesarrrti familiarrü, itopiqui nantarrrtai cuati apariti saübuñü. Chücüsobotipü ui arrüna niyaca au preso.

¹⁷Numo iñataiti au na pueblurrü Roma, yapacheriurutiñü aübu narucurrü ümoti, cheperrrti ichabüca uiti. ¹⁸Tari pucürusuti Tuparrü itacuti auqui nacarrrti Cristo au manu nanenese anche ñana cuati tato Jesús icu na cürü. Tusio ito aemo que arrti bien bayurarati oemo aucutanu, nauquiche anancañü au manu pueblurrü Efeso.

Arrti naqui baserebio ümoti Jesucristo

2 ¹Arrücü saruqui Timoteo, anuneca aübu nanaiña narucurrü aemo. Arrti Cristo Jesús bacheboti acusiubucü, y iculusüancanatiyü. ²Arrüñü surapoi tücañe asucarücü y isucarü sürümanama maquiataca arrüba omirria manitacarrü. Arrücü ito caüma anuneca ümo mañoniünca, bama puerurrü oncatü ümoma, nauqui puerurrü anunecama ito ümo maquiataca.

³Asusiu nataquisürücü tacanarrtü buen sortaborrücü ümoti Jesucristo. ⁴Tusio nurria aemo que arrübama masortaboca chüpuerurrüpü atrabacama ümomantoe. Tiene que aiñama isiu arrüna niyacüpucurrti comandanterrü. ⁵Suraboira ito asucarücü arrüna quiatarrü machepecatarrü: Aboma bama bapurrtarama ümo barucurrü. Pero arrümanu barucurrü ane niyücürü. Chüpuerurrüpü aisamunema isiu nirrancarrüma. Tiene que aisamunema isiu niyücürü. Si no, chüpuerurrüpü acanama. ⁶Arrüna ito quiatarrü machepecatarrü suraboira asucarücü: Arrti naqui masamunuti ñanaunrrü fuerte nurria yatrabacarrrti. Tonenti naqui cusürübo ane utuburiboti

auqui manu niyorrti. ⁷Apensasio nurria arrüba machepecataca. Arrti Señor bayurarati aemo, nauqui atusi aemo isane ümochehio.

⁸Tapü tacürusu naquionco iyoti Jesucristo, itopiqui tonenti nauqui süborico tato eanaqui macoiñoca. Arrti tücañe anati icu cürrü eanaqui nesarri familiarrü David. Tone arrüna manitacarrü urriampae. Tone arrüna surapoi tanu au nanaiñantai. ⁹Itopiqui arrüna manitacarrü surapoi, ichaquisürüca. Itomoenomañü oboi carenaca, tacanarrtü tarucapae nipüinate. Pero arrüna nurarri Tuparrü chüpuerurrüpi nauqui atomoen. Tiene que atusi au nanaiñantai. ¹⁰Sane nauquiche chubatapü inemo arrüna nichaquisürücü auqui naca bama tacümanauncunu uiti Tuparrü. Itopiqui irranca nauqui ataesübuma eanaqui nomünantü uiti Jesucristo, y nauqui aye uimia ñana esati, auna cauta champü nitacüru nanentacarri.

¹¹Tone arrüna ñemanauncurratöe manitacarrü:

Arrtü oconca auqui nacarri Cristo, tiene que aye osoi esati au napese.

¹²Arrtü masamuca tairri ñome taquisürücüca, torrio oemo ñana osüriacabo tacanati Cristo tarucu nüriacarri.

Pero arrtü usucana oñü: “Chusuputacatipü Cristo”, arrtito ñana tiene que nanti que ta chisuputaratipü oñü.

¹³Arrtü uiñocota numacoconauca ümoti, pero arrti chüpuerurrüpi aiñoconoti oñü.

Bayuraratiqui oemo, itopiqui chiñapanrrtipü.

Arrti nauqui ipia atrabacati nurria

¹⁴Sane nauquiche anuneca arrüna manitacarrü. Acüpu ümo bama usaruquitaqui au nürirri Tuparrü, tapü uratoquioma ümomantöe. Itopiqui arrüna nuratoquiquirri champü niyaserebiquirri, tone arrüna uiche amameso ñapanauncurrüma bama oncoi. ¹⁵Aiña nurria aübu nanaiña narucurrü aemo. Tapü acüsoca aübu arrüna natrabacaca ümoti Tuparrü. Anuneca bien arrüna ñemanauncurratöe nurarri Tuparrü. Arrtü aisamute sane, arrti pucünüñati acuatacü. ¹⁶Tapü ane nümoche obi arrüna nipiarrirrimia bama chicocoromatipü Tuparrü, itopiqui arrüma manitanamantai. Manrrü oncomatü ümo arrüna nomünantü. ¹⁷Arrüna ñanunecacarrüma masamuña sunaun tacana manu norrocorrü nürirri yaca. Sane uiti Himeneo y arrti Fileto, chauqui tübatachoboma ui manuma mañanunecaca. ¹⁸Tiñocotama arrüna ñemanauncurratöe manunecarrü. Namatü que chauqui tüsüboricoma tato bama coiño, abu champürrtü sane. Arrübama icocotama nurarrüma chauqui tümameso arrüna ñacoconaucurrüma ümoti Jesús. ¹⁹Pero abomainqui bama chiñocotapüma ñacoconaucurrüma ümoti Tuparrü. Arrüma ichepecacama tacana taman canrrü sürümanarrü, arrüna chüpuerurrüpi aepoco, ane corobo icu sane: “Arrti Señor bacuirarati itacu bama samamecana ümoti”. Corobo ito icu sane: “Arrübama icocoromati Señor, tari iñocotama nanaiña nomünantü”.

²⁰Ichepecacama ito tacana taman porrü sürümanarrü. Arrümau porrü abe ahu aruqui nanaiña nenarrirri. Abe pratuca oro y plata, arrüba tarucu niyucurrü ümoti naqui ipoche. Abe ito arrüba omirriante ui taurrü y suese, arrüba paserebio ümo nanenecatái, tapü arrümanio piquiataca ümorrtü ane pierrta. ²¹Arrtü aiñoocoquio nanaiña arrüba nomünantü, naca caüma tacana manu praturrü oro y plata. Aserebiquia nurria ümoti Tuparrü. Auqui caüma aipiaca aisamune aruqui nanaiña arrüba omirria. ²²Tapü arrianca ñome ba chomirriampü, tacana arrüna nantarrü nirrantiümoma bama mayaüca. Más bien aisamuse arrüna urria, nauqui puerurrü oncomatü aemo. Tari cuasürüti aemo quiatarrü, nauqui urria naca aübu namanaiña bama ñananaunumati Cristo, arrübama urria ñapanauncurrüma. ²³Pero sucanañü tatito, tapü ane nümoche obi arrüba uratoquiquiquia, iopiqui champürrtü omirria. Auqui uratoquiquirri ane chürüri. ²⁴Pero artti naqui baserebioti ümoti Tuparrü, tapü orratorrü nitüborirrti ümoti quiatarrü. Tari ipiacati anitai nurria ümo namanaiña. Tari ipiacati anunecati. Tapü ünantü ümoti, arrtü chichübopümacü nurria bama ununecana uiti. ²⁵Tari ipiacati acunsomocoti ümo bama chichübopümacü aübu nanaiña nibuenucurrti ümoma. Rrepente artti Bae Tuparrü bayurarati ümoma nauqui aiñorronconomacü, y nauqui aye uimia arrüna ñemanauncurratöe manunecatarrü. ²⁶Arrüma mameso ñapensacarrüma uiti choborese. Sane nauquiche isamutema isiu nirrancarrümantöe. Pero artti Tuparrü rranrti nauqui urrian tato ñapensacarrüma, y nauqui ataesübuma ñünanati choborese.

Nisüboriqui macrirrtianuca ñana

3 ¹Irranca suraboito ausucariüü, Timoteo, arrüna sane: Chiyaupü nutaquisürüü ñana, arrtü tüsaimia niyequirrti tato Jesús. ²Au manio naneneca arrübama macrirrtianuca auna icu na cürrü chipiacapüma aquionomacü iyoti quiatarrü. Itopiqui arrüma tarucu nirrancarrüma iyo monirri. Vanurrüma. Churriampü ñanitacarrüma ümoti Tuparrü. Chümacoconaurrüpüma ümo bama yaütörrüma ni ümopü nipiäcütörrüma. Chipiacapüma achampiencama, arrtü ane torrio ümoma. Chaqionomapüü iyoti Tuparrü. ³Champü nicuarrti quiatarrü ümoma. Chirranrüpüma airrimiacama tato nomünantü aübuti quiatarrü. Churriampü ñanitacarrüma ümomantöe. Isamutema isiu nirrancarrüma arrüba chomirriampü. Bruturrüma. Arrüba omirria churriampü ümoma. ⁴Urabomati quiatarrü. Chümapensarapüma. Ñentonaunrrüma. Manrrü urria ümoma pierrtaca, pero artti Tuparrü chücuasürütipü ümoma. ⁵Arrüma mapañama que isuputaramati Tuparrü, pero chütusiopü nicusüurrti au nisüboriquirrimia. Arrüü Timoteo tapü asiquia esa bama sane nisüboriquirrimia. ⁶Aboma ito bama süromatatai au poca atachemacama ñoma paüca ui arrüna ñanunecacarrüma chomirriampü. Sane nauquiche arrüba paüca opichübañantai, ane nomünantü oboi ui arrüna niñurrancarrü ñome ba chomirriampü. ⁷Nantarrtai murrianrrü omoncoi manunecatarrü, pero nuncapü aye oboi arrüna ñemanauncurratöe nurarrti Tuparrü. ⁸Arrübama mañoñünca isamutema isiatai tacana manuma

torrũ macheseruca tũcañe, nũirrimia Janes y Jambres. Arrũma churriampũ nurarrũma ũmo nũriacarrti Moisés. Toneantoe arrũna nisanutema bama mañonũlũca, manitanama churriampũ ũmo arrũna ñemanauncurratoe nurarrti Tuparrũ. Arrũma churriampũ ñapensacarrũma. Chirranrrũpũma aicocoromati Cristo. ⁹Pero contoatai mameso arrũna yachũcoimia, tusiatai que ũmonatai. Tiene que atusi arrũna nisonsocturrũma, tacana nauquiche atusi tũcañe nisonsocturrũma manuma torrũ macheseruca.

Ñacuansomocorrti Pablo ũmoti Timoteo

¹⁰Pero arrũcũ Timoteo, chauqui taisamute isiu arrũna arrtai y oncoi sobi. Aisamute isiu arrũna nirranunecaca y isiu arrũna nirrapanauncu, isiu ito arrũna ñoncatũ ũmoti Jesús y tacane arrũna niñasamunauncucu aũbu genterrũ. Tusio ito aemo arrũna nicuarrũma iñemo macrirtianuca. Chiyatachecapũ uimia. ¹¹Ñasamuca tairri ñome arrũba taquisũrũcũca ui bama tũboricomantai iñemo. Aquionsũ arrũna nichaquisũrũcũ aucutanu taha au manio puebluca Antioquía, Iconio y Listra. Pero arrti Señor nantarrũ bayurarati iñemo. ¹²Sane ito tiene que atquisũrũma namanaiña bama icocoromati Jesucristo, bama urria nisũboriquirrimia. ¹³Pero arrũbama malorrũ y bama mañapanca manrrũ ipiañacatama ñana nauqui manrrũ aisamunema arrũba chomirriampũ, ñatachemacacarrũma, itopiqui arrũma primero atachema uiti choborese.

¹⁴Pero arrũcũ Timoteo, tapũ aiñocota arrũna tiyebo obi. Itopiqui tusio nurria aemo que tone arrũna ñemanauncurratoe manunecatarrũ. Puerurrũ ito oncatũ ũmo bama uiche aiñununecanamacũ, itopiqui asuputacama nurria. ¹⁵Arrũcũ auqui numo chimiancũqui asuputacai Nicororrũ uiti Tuparrũ. Auqui tusio aemo causane nauqui ataesũbu eanaqui nomũnantũ, ta arrtũ oncatũ ũmoti Jesucristo. ¹⁶Nanaiña arrũna Nicororrũ corobo tũcañe ui bama maconomonoma uiti Espĩritu Santo. Sane nauquiche baserebio nauqui manuneca isiuqui y macuansomoco auqui, nauqui atusi oemo causane nauqui urria nupapanauncu, y urria nosũboriqui au narrtarri Tuparrũ. ¹⁷Ui Nicororrũ tusio nurria ũmoti naqui baserebio ũmoti Tuparrũ. Uirri ipiacati nurria aisamunenti arrũba omirria.

4 ¹Rranitaca aemo au nũirrti Tuparrũ y au nũirrti Señor Jesucristo, naqui cuati tato ñana tacanati yarusũrũrũ yũriaburrũ, nauqui acurrati aũbu bama sũboricoiqui y ũmo bama ito tũcoiño. Suraboira nurria nirraccũpucu aemo: ²Tapũ ubata aemo nanunecaca arrũna ñemanauncurratoe manitacarrũ icũtũpũti Tuparrũ ũmo genterrũ. Aiña nurria, champũ nũmoche arrtũ urria ũmoma, o churriampũ. Acuansomoco ũmoma. Anita nurria ũmoma, sane nauqui aicocoma. Tapũ atacheca. ³Itopiqui cuantionqui naneneca anche ñana manrrũ ipiañacatama macrirtianuca, chirranrrũpũma oncoimia arrũna ñemanauncurratoe manitacarrũ. Bapacheroma maquiataca mañanunecaca, nauqui onsaperioma manunecatata isiu arrũna nirrancarrũma churriampũ. ⁴Sane nauquiche

iñocotama arrüba nomirria, itopiqui arrüba chomirriampü. Icocotama caüma aruqui nanaiñantai cuentuca. ⁵Pero arrücü Timoteo, tapü mameso napensaca. Tapü ünantü aemo arrüna nataquisürücü. Atrabaca nurria aübu narucurrü aemo. Urasoi arrüna nurarri Tuparrü. Aiña nurria naserebiqui ümoti.

⁶Arrüna sucanañü aemo sane, itopiqui túsai itorrimia nisüboriqui tacana macumanatarrü ümoti Tuparrü, tiene que aítabajomañü. Tirranrrü aiñanai manu nanenese anche yürotü icuqui na cürrü. ⁷Auqui caüma chauqui nirratabacaca ümoti Señor. Urria niyaserebiqui ümoti chepe nitacürrü caüma. Enterurrü nisüboriqui chütacürusupü nirracoconauncu ümoti, ñoncatü nurria ümoti. ⁸Tütane nisua taha au napese. Tiene que atorri icharusübu uiti Tuparrü ñana au manu nanenese anche bacurrati ñemanauncurratoe. Pero ta champürrtü iñemoantai tiene que atorri, sino ümo namanaiña bama cuasürüti Señor ümoma, bama barrüperara cümenuti.

Nurapoiti Pablo ümoti Timoteo

⁹Asamu nurria iñemo, ariacu contoatai tauna yesañü. ¹⁰Arri Demas iñoconotiñü, itopiqui tarucapae nirrancarri ñome ba icuqui nantai currü. Sürotitü au manu pueblurrü Tesalónica. Arri Crescente sürotitü au manu cürrü Galacia, y arri Tito sürotitü au manu cürrü Dalmacia. ¹¹Tamantiatai Lucas anaticu auna ichepeñü. Apachesiusurri Marcos y aiquiarri tauna, arrtü ayecatü. Auna puerurrü ayurati iñemo ümo arrüna trabacorrü. ¹²Chauqui ticüpuicati Tíquico au pueblurrü Efeso. ¹³Arrtü ayecatü, aiquia tauna iñemo nirrüburi. Iñocota aucutanu au Troas au niporri Carpo. Aiquiasio ito tauna iñemo arrümanio libruca ichepe manio niyesa quichonimiacaca.

¹⁴Arri maniqui herrerurrü, nürirri Alejandro churriampü yachücoiti iñemo aucutanu. Pero uiti Señor bacheboti tato ümoti itobo arrüna niyachücoiti iñemo. ¹⁵Asasai nurria ñünanati, itopiqui tarucapae nitüborirri ui arrüna supanitaca aucutanu isucarüti.

¹⁶Arrüñü tütane taman niyücü uimía esa bama mayüriabuca, nauqui acurrtama saübuñü. Yacatü uimía tamañü. Namanaiña bama niyesa amigorrü iñoconomañü. Pero rranquiquia pünanaquiti Tuparrü, tapü ane causane uiti ümoma, itopiqui arrüna iñoconomañü. ¹⁷Pero arri Señor anancati ichepeñü, bayurarati iñemo. Sane nauquiche surapoi isucarü nanaiña genterrü arrüba chütüpü israelitarrü arrüba omirriantai manitacarrü icütüpüti Jesús. Ichaesübuca uimía ñünana carrticurrü tacanarrü ichaesübuca ahiqui nuitümürrü. ¹⁸Arri Señor itaesümununutiñü ñana ito ñünana bama malorrü. Auqui caüma tiene que aiquianatiñü au napese, auna cauta ane nüriacarri. Tapü tacürusu numanauncu ümoti. Amén.

Ñaquioncorrti Pablo tanu

¹⁹Nirraqionco tanu ümoti Aquila y ümo Prisca, y ümo nesarrti familiarrü Onesíforo. ²⁰Arrti Erasto süsioti au Corinto. Tapü arrti Trófimo iñoccati au Mileto, itopiqui maunroconoti. ²¹Asamu nurria, ariacu tauna yesañü antes que aiñanai nitiempo rrimianene. Ñaquioncorrüma tanu aemo namanaiña bama aboma auna. Arrti Eubulo, arrti Pudente, arrti Lino ichepe Claudia y namanaiña bama maquiataca aboma auna.

²²Tari anati Señor Jesucristo achepecü. Tari icunusüancanati año Bae Tuparrü. Amén.